

1627

L'ANTI-
HUGVENOT;

AV DUC DE
ROHAN. D

POUR RESPONSE A
son Manifeste, ou Declaration.

34
A PARIS.

Chez IACQUES BRISSEAU au
mont Saint Hillaire.

M. DC. XXVII.

Avec Permission.

Case

F

39

826

162702

L A N T

H V G V E N O T

A V D T C D E

R O H A N

P O R R A R E F O R M E

is manifest in Delaware


A P A R I S

Georges Brissot

mont Saint Hillaire

M D C X X V I I

Paris



AV DVC DE Rohan.



I l'Eſcriture dit de Iudas Monſieur
qui trahit ſon bon maiftre, qu'il euſt
mieux valu qu'il ne fuſt iamais né,
i'eſtime auſſi qu'il ſeroit à deſirer
que la Mere qui vous a mis au monde euſt eſté
ſterile comme vne mule, quand il luy vint en
fantaiſie d'enbrener la France d'une telle en-
geance. Il vous faiſt beau voir mener la vie
que vous faiſtes, vous qui d'un coſté eſtes yſſu
de l'illuſtre race de Merluſine & qui d'autre
part eſtes fils d'un Pere debonnaire, pacifique &
l'eſpée duquel ne fiſt iamais mal à perſonne.
Certes ie croy que ſi ce bon Gaulois là viuoit il
vous cracheroit au nez & vous deſauoüeroit
pour ouurage de ſa braguette, vous voyant ſi
denaturé comme vous eſtes enuers voſtre Pa-
trie, que vous auez miſerablement expoſée en
proye à l'Anglois, lequel vous vous glorifiez
d'auoir appellé & introduit dans ce Royaume.
*On croit (dictes-vous) & ie ne le nye point la venue
des Eſtrangers en ce Royaume auoir eſté procurée par
les ſoings de mon Frere & de moy. C'eſt vn grand*

aduantage disent les Aduocats du Palais quand
 le criminel confesse librement son delict. Vous
 n'en auez pas faict la petite bouche dès le pre-
 mier son de cloche de vostre toxain, où pour
 en expliquer le tiltre vous adioustez ces paroles
 expressees *qu'il contient la iustice des raisons & motifs*
qui vous ont obligé à implorer l'assistance du Roy de la
grande Bretagne & prendre les armes pour la deffence
des Eglises reformées de ce Royaume. De sorte que
 si par bonne fortune on vous met vn de ces
 matins la main sur le collet, voila vostre pro-
 cez tout instruit. Il ne vous faudra que ouir
 sommairement sur la selette sans vous presenter
 ny gehenne ny torture pour vous conuaincre
 de la mesme perfidie d'vn Robert Dattois &
 d'vn Geofroy de Harcourt qui fetherent la plan-
 che à l'inuasion du Roy Edouard troisieme du
 tēps de Philippes de Valois. Je ne doute pas au-
 si que bone & briefue iustice ne vous soit faicte
 & que vous ne receuiez vn iour le mesme sa-
 laire de leur reuolte. Vous nous faictes allēz
 voir d'abord que vous estes de ces innocens
 fourrez de malice. Je me pourrois contenter
 d'opposer la sincerité de toutes mes actions au blasme
 que les ignorans, ou malicieux en reprendront de verser
 sur mon innocence & sur la necessité de ma resolution
 & me suffiroit si ie n'auois esgard qu'à moy mesmes de
 easter a mieux faire. Ainsi se deffendent les
 bonnes causes & ceux qui vous accusent ont
 grand tort. Le valet de Marot estoit larron,
 gourmand, paillard, menteur, iouieur de cartes,
 & de dez, mais au reste le meilleur garçon du

monde. Il ne faut pas aussi faire vn si grand
quamquam de ce qu'vn Gentil-homme de bon-
ne maison tourne sa Iaquette, si de François il
se metamorphose en Anglois, s'il prend les ar-
mes cōtre son Roy, s'il souleue les peuples, s'il
est proditeur de sa Patrie, & si par zèle reformé
il renuerse tout sans dessus dessous. Ce ne sont
là que fleurettes & que gallanteries du temps.
Le Roy est bon, il pardonnera tout en fin par
vn traicté de paix, en faueur de tous les Rebelles
apres qu'ils auront ioué leurs ieux. Reposez
vous doucement sur cet orillier & vous fiez à
cela en attendant que les heritiers du Bour-
guignon vous viennent vn peu chatoïiller le chi-
non du col pour vous reueiller. Encore est-ce
signe qu'il y a dans le pourpoint vn ver qui
mord vostre conscience, quand vous dictes que
vous tascheriez à mieux faire s'il n'y alloit que
de vostre interest. Il seroit mes-huy temps de
commencer. Car iusques à present vous n'avez
rien faict qui vaille, ne vous en desplaise. Vous
donnaistes de tres-mauuais esres de vostre fi-
délité, quand quelque temps apres le decez du
feu Roy vostre bien-faicteur vous changeastes
tout l'ordre que viuant il auoit estably dans
Saint Iean d'Angely pour conseruer cette
ville-là en paix, & depuis il ne s'est rien brassé
de factieux dans l'Estat que vous n'en ayez tou-
siours esté le Porte-enseigne : Mais par ce que
vous nous apprenez qu'à l'ouuerture des choses
grandes & extraordinaires qui arriuent entre les hom-
mes, chacun en disoit à sa fantaisie, vous nous

permettez bien de dire nostre ratellée sur ce
 que vous faictes par vne voye si extraordinaire,
 quoy que tous les Huguenots comme vous
 confessez ne soient pas de vostre aduis par man-
 que de courage ce vous semble. *D'où vient par-
 my nous la diuersité de langage & la diuision des cœurs
 déchirez par sentimens contraires tousiours accompa-
 gnez de foiblesse.* Il n'y a bonnement que ce Clerc
 d'armes le Duc de Bouquiquan qui accorde sa
 vielle avec la vostre & estans tousdeux oiseaux
 de mesme aire on oit vne douce harmonie de
 vostre chant & non pas vn croassement rude &
 mal agreable comme celuy des corbeaux qui
 pour bon augure voltigent d'ordinaire à ce
 qu'on dit à l'entour de vostre logis, quelque
 part que vous alliez. Helas que seroit-ce si tous
 ceux de vostre Religion estoient aussi mal affe-
 ctionnez à la France que vous estes? Vous ap-
 pellez foiblesse la fidelité qu'ils ont enuers leur
 Roy, & ne m'estonne pas si vous dictes *que ceste
 venue des Anglois sera long temps le suiet de tout le
 bien, ou de tout le mal qui se dira au dedans & au de-
 hors du Royaume.* Ainsi fist parler de sa vie le
 Cheurier de Nismes comme vous sçauiez & le-
 quel voyant qu'on ne s'entretenoit iamais de
 luy, lascha vn iour toutes ses chevres dans les
 vignes du bourgeois, où ces bonnes bestes firent
 vn tel degast que le compagnon donna bien su-
 jet de faire discourir de luy. Et si vn Athenien se
 contenta de couper la queue de son chien pour
 faire parler le peuple de sa ville, vous nous
 faictes bien pis. Car afin que vous soyiez des plus

auant dans les chroniques & que la posterité ait
 vostre memoire en souëfue odeur vous nous
 faictes ceste belle protestation. I'ay creu estre de
 mon deuoir de mettre en auant ce petit discours pour
 iustificier cette action à tout le monde, faire voir aux en-
 nemis mesmes quelle est fondée sur vn droit tout eu-
 dent & aux amis que nous y auons esté forcez par les
 plus pressantes loix de la necessité. On dit de l'élo-
 quence de Pericles quelle estoit telle qu'encore
 qu'on l'eust brauement porté par terre en la
 lutte il persuadoit neantmoins qu'il n'en estoit
 rien. Aussi vous estes si bon Rethoricien que
 vous voudriez faire croire aux esprits plus rafi-
 nez que le crime d'Estat le plus capital n'est
 qu'un peccadille. Tant plus vous tirez pais, tant
 plus vous vous allez diffamant & noircissant
 comme le cul d'une poile a frire. Chacun sçait par
 quelles raisons ie fus obligé à conclure la paix traitée
 deuant Montpellier, en laquelle ie pensois procurer tout
 à la fois deliurance & respiration à l'Eglise de Dieu, à
 mon Roy l'honneur & la gloire qu'il pouuoit desirer &
 à tout l'Estat le repos & la paix qui luy estoit absoluë-
 ment necessaire pour arrester le progres du Roy d'Es-
 pagne qui fouloit outrageusement à ses pieds les meil-
 leurs & plus fidelles Alliez de ceste Couronne, afin
 de venir plus facilement à bout de ceste Monarchie
 apres laquelle il y a si long-temps qu'il abaye. A ce
 compte le Roy deueroit à vostre courtoisie &
 non pas à vostre foiblesse la reddition de Mont-
 pellier, comme si vous estiez homme qui eust
 bien de l'honneur & de la gloire de reste, pour
 en faire part non seulement a vos semblables.

Mais aux Roys mesmes. Ce fut sa Majesté,
& non pas vous, qui par sa Clemence donna
lors la paix à la France à l'instance priere
que luy en firent les Depputez de vostre Religion,
qui le genouil en terre luy demanderent
pardon leurs cœurs (disoient ils) humiliez
plus que leurs corps & la supplierent tres-humble-
ment de les recevoir en sa grace, & à l'exemple de
Dieu duquel elle est l'image d'avoir esgard à leurs in-
firmittez & donner quelque chose à la crainte qu'ils
auoient tous eus de voir la liberté de leurs consciences
opprimée. Que tant plus sa Maieité les trouuera
coupables tant plus aussi trouuera-elle de place pour
employer sa Clemence. Ce furent proprement ces
submissions qui attendrissent le cœur du Roy
& non pas vostre seule entremise, non plus que
la ville n'auoit esté soustenuë par vostre valeur,
dont les Huguenots se plainquirent grandement
de vous, comme d'un General qui les auoit
tres-mal assistez. Car dans la paix vous petilliez
de faire la guerre: Mais vous n'eustes pas
plustost ouy la premiere mousquetade vous
siffler aux oreilles que vous ne parlassiez de la
paix. Ce fut aussi par vostre aduis qu'ils de-
manderent composition comme vous n'oubliastes
pas la vostre, par le bon argent qui vous fut
promis & lequel ne venant pas assez tost à vostre
fantasie vous fist recommencer mangerie & rentrer
en guerre plus belle que deuant. Il n'est non plus
croyable que les considerations de l'Espagnol vous
portassent à la paix que vous dictes. Vous ne luy
voulez pas tant

tant de mal que vous faictes semblant. La recherche que vous auez faicte de tirer vostre part de l'or de ses Indes en faict foy. Le gentilhomme des vostres a qui le Parlement de Tholose fist coupper le col reuenant d'Espagne decouurit tout le pot aux roses.

S'il ny auoit point d'autres gens que vos semblables qui empeschassent son progrez il iroit le grād galop à la grādeur où vous dictes qu'il aspire il y a si long temps: Mais ie ne sçay (adioustez vous insolemment) par quels conseils la parole que sa Maieité me confirma iusques dans Lyon & depuis encores par plusieurs lettres se trouua soudainement enfreinte, la foy publique violée & toutes nos plus cheres & plus necessaires libertez opprimées. Car au lieu de remettre selon les Breuets & conditions de la paix Montpellier en son premier Estat, le Consulat est changé & my-party par violence, vne Citadelle y est bastie comme vn monument erigé pour condamner ou faire mourir nostre confiance & vne garnison de quatre mil hommes entretenus dans la ville à la foule insupportable des habitans. C'est là parler de son Roy en termes d'honneur le qualifiant du tiltre de violateur de la foy publique & de choses mesmes qu'il n'a iamais promises aux sens que vous vous figurez. Ce seroit merueilles si vn criminel disoit beaucoup de bien de son iuge. Vous estes fasché à ce que ie voy de ce dont plusieurs autres se resioüissent, voire des plus zelez de vostre Religion, en ce que aujourd'huy Montpellier est miraculeusement deliuré de la dure seruitude en laquelle il estoit lors

qu'il ne despendoit que de la domination insolente d'un Cercle composé de gens ramassés & où comme en la Cour du Roy Petait chacun estoit maistre. Celuy qui y crioit le plus hault & qui cornoit la guerre avec plus de chaleur estoit estimé le meilleur François & le plus affidé au party: Mais graces à Dieu l'autorité du Souuerain y est auioird'huy recogneuë, l'égalité gardée & la iustice si sainctement distribuée que Catholiques & Huguenots y vivent comme freres & bons concitoiens; les charges publiques & tout le gouvernement Politique de la ville estant partagé entr'eux, encores qu'il eust esté facile à sa Majesté victorieuse d'en priuier les vns à l'entier establissement des autres. Et si le Roy y a faict construire vne Citadelle vous ne pouuez pas ignorer que ce n'ait esté à l'instance & réquisition de tous les habitants d'une & d'autre Religion, estimans que par cette bride les gens de bien seront à couuert de l'oppression qu'ils souffroient sous vn gouvernement populaire & Anarchique. Ioinct que ceste Citadelle estant en sa perfection la ville se trouuera deschargée du logement des troupes que le Roy y entretient à ses despens, sans qu'on puisse dire avec verité que le soldat y viuë autrement qu'en tout ordre & discipline sans foule du Bourgeois & de l'Artisan, lesquels tant s'en faut gagnent & profitent par le grand argent qui court & se distribue tous les ans entre les gës de guerre. En fin l'irreuerence que les factieux de Montpellier

portaient à Monsieur le Marechal de Chastillon leur gouverneur, l'insolence dont ils vivoient envers leur Euesque & leurs Magistrats, l'iniuste & violente destitution du Sieur Alard leur premier Consul soupçonné d'estre seruiteur de Roy, l'horrible assassinat qu'ils commirent en la personne du feu President du Cros de leur mesme Religion & despesché deuers eux par feu Monsieur le Connestable de Lesdiguières pour faire quelque ouverture de paix & d'accommodement, la rage & forcenerie qu'ils exerçoient mesmes contre les parois de nos Eglises lesquelles ils demolirent toutes: Ces choses enormes dy-ic ont faict desirer à vn chacun le changement de face aux affaires tel qu'on le voit aujourd'huy en cette ville-là, dont le Roy est grandement loüable; tant s'en fault qu'il en doüe estre blasmé. Je croy que vous eussiez bien voulu faire de Montpellier ce que vous faictes aujourd'huy de Nismes, ceste pauvre ville qui s'est volontairement asservie sous vostre ioug, estant la boutique & l'enclume où se forgent toutes les factions dont vous pensez comme avec autant de Machines renuerfer cette Monarchie: Mais à bon chat bon rat. Vous vous deuriez souuenir que c'est à la seule bonté du Roy que vous deuez vostre esslargissement, lors que Monsieur de Valencé vous arresta dans Montpellier où vous veniez encores fleurir s'il y auroit point moyen de broüiller. Il y en a qui estiment que c'eust esté vne œu-

ure pieuse & meritoire de vous auoir lors si bien mis en cage que vous ostant la clef des champs vous n'eussiez pas peu faire le mal que vous auez fait depuis.

Vostre plaincte n'est non plus iuste quand vous dictes. Qu'au lieu de razer le fort de la Rochelle selon les mesmes promesses portées par les mesmes Breuets de sa Majesté on l'a accreu, fortifié & muni de toutes choses nécessaires pour vn long & perpetuel establisement & d'iceluy machiner plusieurs entreprises contre la ville, qui desconuertes ont esté autorisées non seulement par l'impunité, mais mesmes par la recompense donnée aux entrepreneurs. Vous deuenez vn rude & merueilleux censeur des actions de vostre Roy. Si vn de vos valets vous traictoit de cet air, vous croiriez vostre condition miserable de passer a sa mercy. Je veux qu'en vn temps on vous ait peut estre promis la demolition de ce fort : Mais que n'a-t'on fait & attenté depuis pour obliger sa Majesté à reuocquer iustement sa parole, les Rochelois s'estans rendus indignes de l'accomplissement d'icelle? Ont-ils effectué de leur part ce qu'ils deuoient par le mesme traicté? Ont ils par honneur arraché la moindre pierre de leurs nouuelles fortifications? Ont ils esté plus retenus qu'auparauant à toutes leurs pirateries & depredations? Ont-ils non plus que vous eu moins de commerce & d'intelligence avec l'Estranger pour coniuurer la subuersion de cet Estat? Apres cela vous auez bonne grace de trouuer mauuais que le Roy

pouruoye à sa seurreté & qu'il aille au deuant du mal qu'on trame contre luy. En fin si vous en estiez creu on lapideroit le premier Catholique qui oseroit entreprendre contre la Rochelle ceste sainte Syon, qui à vostre aduis doit estre invulnérable. Puis que vous ne trouuez pas bon qu'on en regarde seulement les murailles i'aduertiray nostre Curé de publier Dimanche au Prône que Monsieur le General des Eglises n'a pas aggreable qu'on entreprenne contre ceste Place, avec monitoire de vous reueler tout autant de desseins qu'on fera contr'elle & que quiconque pensera de la liurer au Roy encourra excommunication au lieu de recompense. On n'establit point (ce vous semble) l'exercice de nostre Religion aux lieux d'où il auoit esté chassé durant la guerre, mais durant la paix mesme on enuolope plusieurs autres Eglises dans vne mesme persecution. On emprisonne de nos Pasteurs, On faict des Edicts & deelarations contre la liberté de nostre discipline, comme il appert de l'assistance des Commissaires dans les assemblées Ecclesiastiques. En haine de la Religion on demolit, on raze & demantelle plusieurs Places en pleine paix, comme Caumont, Castillon, Pontorson & autres. Voila certes de grandes plaintes & dignes de la descente des Anglois en France par vostre intercession. Ignorez vous ie vous prie que soudain apres que la paix fut publiée, le Roy enuoya des Commissaires d'une & d'autre Religion par les Prouinces pour executer le traitté de bonne foy & pour remedier à toutes choses sur

les lieux? Or s'il est arriué en quelque part qu'un Ministre ait fait chose qui merite reprehension, ces gens là ont-ils le chef oinct d'une huyle si sacrée qu'ils soient dispensez des loix de l'Estat & de la punition des Magistrats? Dailleurs, il ny a que les Hiboux qui craignent la lumiere. Si donc en vos assemblées que vous appelez Ecclesiastiques, encores qu'il n'y ait ny mytre ny crosse, il ne s'y traite que de choses licites, pourquoy vous formalisez vous si de la part du Roy il y a quelque Officier qui y assiste? Lisez vostre histoire & elle vous apprendra que Henry III. vous accordant deux villes de seureté voulut qu'il y eust un gentil-homme Catholique & suffisant pour auoir l'œil à ce qu'il ne s'y fist chose qui contreuint à son autorité & au repos de son Royaume. Quant aux Places dont vous parlez seroit-il raisonnable que si le Roy en a traité avec les Gouverneurs qui estoient dedās & qui de gré à gré en ont tiré de grosses recompenses comme a fait entr'autres celuy de Pont-orfon qui receut cent mil escus de sa Maiesté, seroit-il raisonnable dy-ie que vous eussiez le drap & l'argent? Le Roy n'a t'il peu que sous vostre bon plaisir faire desmolir des Places qu'il a rachetées à si cher pris encores quelles fussent à luy? Croyez Monsieur que qui tout le veult, tout le perd, & suis bien trompé si vous n'estes enfin mauuais marchand du trafic dont vous vous meslez, en espousant ceste querelle iniuste avec vne passion si violente quelle vous cre-

La
Popl.
l. 21.

ue les yeux. Passons outre à vos autres lamen-
 tations, On ne restablit point la chambre del' Edict
 dans la ville de Castres comme il auoit esté promis,
 ains on l'à transferée à Beziers Ville de contraire Re-
 ligion & seditieuse. On gehenne, on tourmente, & l'on
 enuoye aux galleres des gens d'honneur & innocens
 sur des soupçons sans fondement. Ce langage me
 faict ressouuenir du côte qu'on faict d'un Nor-
 mand, qui rencontrât par les chemins vn sien
 voisin lequel luy demanda ce qu'on faisoit à
 Paris, croiriez vous (luy respondit-il) que
 ces meschantes gens-là ont faict pendre ces
 iours passez le plus homme de bien de nostre
 village, pour auoir seulement desrobé vn
 pauvre Calice d'argent; Je ne mestonne pas
 aussi si vous en voulez à ces Messieurs de la
 Chambre de Beziers, quoy que la moitié soit
 de vostre Religion, & lesquels à ce qu'on m'a
 dit ont vn peu faict monter a reculons Mon-
 sieur vostre Preuost, pour les œures de supe-
 rerogation qu'il auoit faites couuert & affu-
 blé de vostre autorité. Vous auez certes rai-
 son de vous plaindre, d'autant que Castres
 estoit mieux à vostre bien-seance. Car la plus
 grande partie de cette Ville là estant hugue-
 note vous y auez plus de credit de tirer du
 gibet ces gens d'honneur, & ces innocens
 qu'on traicte si mal ailleurs. Et le mal d'au-
 truy ne vous estant pas si sensible que vous
 oubliez le vostre propre, tant vous auez de
 zele au bien public, vous nous voudriez faire
 croire qu'on a suscité des Gentils-hommes voisins

du lieu où vous auez choisi vostre retraite pour se
 saisir de vostre personne, & qui au mesme temps
 ont faict diuulguer parmy ceux de vostre Religion,
 personnes gagées & payés pour cela que vous auriez
 rendu la liberté de vos Eglises, & conuenu du sa-
 laire damnable de leur dernière & infalible ruine.
 Voila que cest de seruir des ingrats & de se
 fier à des peuples volages qui ayment aujour-
 d'huy, & hayssent demain. Si ces meschants-
 là vous eussent amené à Paris, il n'y a loup
 blanc qui eust faict sortir plus de petits enfans par
 les rues que vous en eussiez veu à vostre queuë
 jusqu'à la porte de la Bastille, où l'on vous re-
 serue vne belle chambre tapissée. I'auois bien
 ouy dire que les Huguenots ne vous tenoient
 pas pour homme qui les seruist gratis, & que
 vous estiez franc au colier & à tout faire en
 payant. C'est pourquoy l'Histoire medisante dit
 qu'un autre de vostre Religion les auoit vendus
 & que vous les auez liurez: Mais d'auoir trahy
 la liberté de vos Eglises & conuenu du salaire de
 leur ruine, c'est chose pour ne vous en mentir
 point dont i'en ay à vous accuser ny à vous ab-
 londre, tant i'ay crainte de faillir & de me mes-
 prendre. Je voy seulement que vous nous atta-
 quez en grand Capitaine tel que vous estes, &
 nous battant en ruine vous tirez tâtost vn coup
 de canon deçà, tantost vn autre delà, changeant
 de batterie comme bon vous semble. Car pour
 mettre le Roy en son tort à vostre accoustumée,
 & sur toute sorte de sujets vous dites, *Que pour
 couvrir aux Estrangers de nostre Religion le dessein*
 qu'ont

qu'on auoit de nous perdre, on publioit hautement la guerre contre l'Espagnol, la Ligue avec les Princes, & Republiques interessées pendant que sous main par l'entremise du Legat la paix se trama avec, & se conclut finalement comme le temps la fais voir, laissant en proye ceux qu'on a animez & armez par cette esperance. Cependant on prepare tout l'appareil necessaire au bloquement de la Rochelle. C'est grand cas que tout vous fait ombre & qu'il n'y a rien pour visible & palpable qu'il soit, que vous ne conuertissiez en idées Platoniques. Estoit-ce ie vous prie vne guerre imaginaire que celle de la Valtoline, où la France auoit porté ses armes commandées par vn Officier de la Couronne, où tous les iours il se faisoit des combats senglants & des prises & attaquemens de places? Estoit-ce non plus vne guerre imaginaire que le secours que le Roy enuoya à Monsieur de Sauoye commandé par vn Cōestable de France, qui defist souuent l'ennemy en cāpagne & qui luy prist des villes à force d'armes? Je crains que vo^{us} ne vous amusez tant à feuilleter les tailles douces de vostre Hortelius que vous ne vouliez voir les batailles & les combats qui se font au monde que dans des cartes. Car vous sçauiez qu'il n'a tenu qu'à vous que vous ne fussiez de la partie, y ayant esté conuié plusieurs fois par Gentil-homme depesché exprés vers vous. Cōment dictes-vous donc qu'on publia hautement la guerre aux Estrangers de vostre Religion pour couvrir le dessein qu'on auoit de vous perdre? Et ne se faisant point de guerre que pour auoir la paix, pourquoy trouuez

ous mauuais qu'un Legat soit interuenu pour
 la procurer avec des conditions honorables &
 auantageuses comme elle s'est concludë depuis à
 vostre grand regret ? Je parle ainsi parce que
 vous croyez d'auoir par cette guerre là plus de
 moyen d'entreprēdre dans l'Estat, les forces du-
 quel eussent esté diuisées en plusieurs endroicts.
 Et si d'ailleurs le Roy auoit quelques vaisseaux
 en ses ports de Bretagne, vous estes bien om-
 brageux de vous persuader sans autre lumiere
 que ce fust vn appareil pour aller bloquer la
 Rochelle en pleine paix: Mais ie vo⁹ sens venir,
 tout ce que vous auez dit de cette matiere n'est
 tant que pour colorer vne action si honteuse
 qu'il ny a excuse dont vous ne la plastriez com-
 me d'un faux masque pour en deguiser la verité.
 C'est pourquoy continuant à parler de ce mes-
 me bloquemēt de la Rochelle vous dictes *Quel-*
le s'en alloit perduë si on ne preuenoit le coup par quel-
que prompte & hardie resolution, & que pourtant mon
Frere designa l'entreprise de Blauet qui eut le succez
que chacun scait & qui toutesfois se termina à vn
plus grand aduantage pour noz Eglises qu'on
n'eust osé esperer, par ce que le Roy ayant trouué
bon que la paix se conclust par l'interuētion des Ambas-
sadeurs d'Angleterre lesdits Ambassadeurs rendirent
leur Maistre caution de l'observation inuiolable du trai-
té & ce par lettres & traité signé de leurs seings &
scellé de leurs armes. I'admire l'accortise de vostre
 esprit & comme vous auez le pied leger pour sor-
 tir brusquement d'un mauuais passage: Mais
 moy qui suis plus pesāt & vn pen fuet à la cour-

te haleine ie m'arrestaray dauantage sur ce que vous n'auiez ozé toucher que du bout des doigts de peur de vous eschauder. Il est donc à sçauoir que Monsieur de Soubize vostre Frere que ie nôme par honneur fist en pleine paix yn traictdigne de la grandeur de son courage. Car lors qu'il vit le Roy empresse à secourir ses Alliez hors du Royaume, il fist brauement la cane, n'en voulut pas aller manger si loing, & prenant son temps lors qu'on se doutoit moins de luy il s'equippa en vray Corsaire au haure de la Rochelle, & s'en alla droict à Blauet surprendre les vaisseaux que le Roy y tenoit. Je croy qu'il auoit aussi dessein sur la place: Mais ny ayant faict que l'eau toute claire par la diligence des seruiteurs de sa Majesté qui se rallierent le plus promptemēt qu'ils peurent, il fist voile & s'en reuint avec son butin. C'est attentat fut estimé fort outrageux, & en parla-ton en termes si honorables pour luy, que le bruit courut qu'il toucha en caximini quelque argent du Prince de qui vous feignez d'estre plus ennemy en apparence que vo⁹ n'estes peut estre en effect. Sur cela le Roy à l'assistance de ses voisins de vostre Religion mesmes & par le commandement qu'il donna à ce valeureux Duc de Montmorency lors Admiral de France il se mist en estat de vanger cēt affront, ou pour mieux dire de chastier la perfidie de ce bon sujet. Aussi le progresz des armes d'vn si grand Monarque tousiours vainqueur, fut si heureux que iamais Rustre ne fut mieux estrillé que fut lors Monsieur de Sou-

bize vostre cher Frere ; Car sa deroute fut telle que battu & halbreué par Mer & par terre , il perdit la meilleure partie de ses hommes & de ses vaisseaux , & abandonna vaillamment les Isles de Ré & d'Oleron. De sorte que semblable aux Dieux d'Homere qui se cachoiẽt dans des nuës , il disparut soudain , & sans se soucier si les morts seroiẽt enterrez , ou mangez des chiens , il s'embarqua dans vn miserable nauire qui luy restoit de son débris , & singla droict en Angleterre , la seule retraicte de ce Capitaine infortuné. C'est ce que j'ay creu deuoir estre expliqué vn peu plus au long que vous n'auiez pas voulu faire , de peur de vous rendre suspect aux Eglises , si vous disiez naïfuiement les choses comme elles se passent. Ceste action heroi- que , selon vostre aduis , *se termina à vn plus grand aduantage pour vostre Party qu'on n'eust es- pérer.* Et cét aduantage est , en ce que la paix qui s'en ensuiuit , se fist par l'interuention des Ambassadeurs du Roy de la grande Bretagne , qui demeura , à ce qu'on vous a fait accroire , caution & garand de tout le traicté , comme il appert (dites vous) *par acte bien signé & seellé des Armes des mesmes Ambassadeurs.* C'est vne opinion dont il me semble que vous vous estes vn peu trop facilement laissé cœffer , pour vn grand homme d'Estat , tel que vous pensez estre. Et si afin de vous desabuser , il vous plaisoit sur ma parole de venir vn peu regarder quelle heure il est au cadran de la Samaritaine , les Colporteurs du Pont-neuf , qui font retentir l'air de vos

Iolianges, vous fourniroient de deux petits Dis-
 cours qu'on a depuis peu donnez au public,
 dont l'un est intitulé *Le Surveillant de Charenton*,
 & l'autre *Le Fidelle François*. Vous verriez là
 comme en plein midy tout ce que vous dites
 de ceste caution pretendue, estre tellement
 conuaincu de faux, que vous auriez honte vne
 autre fois de vous reposer sur de simples paro-
 les en chose si importante: Mais par ce que
 vous estes maintenant fort occupé à courir le
 mulet & à petarder des bicoques au bas Lan-
 guedoc, à peine vous pourriez vous destour-
 ner d'une si honorable besongne pour vous ve-
 nir promener à Paris, ie vous prie de croire
 qu'il est faux comme le Diable, que le Roy, ny
 de bouche, ny par escrit, ny par l'organe d'au-
 cun de ses Ministres, ait iamais admis les Am-
 bassadeurs d'Angleterre pour arbitres n'y me-
 diateurs de cette paix, tant s'en faut qu'il ait
 rendu leur Maistre pleige d'aucune promesse
 qu'il ait faicte aux Rochelois de demolir le Fort
 Lonys, lequel au contraire demeura à sa Ma-
 jesté par le dernier traicte faict avec eux, & le-
 quel est signé non de deux hommes tels que
 vous alleguez, & qui vous ont dit ce qu'il leur a
 pleu pour vous bailler du foye de Connil: Mais
 par des personnes publiques d'une & d'autre
 Religion, qui ont esté employées par sa Ma-
 jesté à la resolution du mesme traicte, pour oster
 toute doute que la piece ne fust pas vraye & au-
 tentique. Vous mesmes produisez vne chose à la
 fin de vostre Manifeste qui vous coupe la gor-

ge, & qui vous faict grandement varier. Car vous rapportez la lettre que ces Ambassadeurs vous escriuirent, où parlans des Depputez enuoyez des Prouinces pour solliciter la paix en Cour, ils vous disent, *que iceux ayants en esgard aux remonstrances que nous leur auons faictes, & aux assurances que nous leur auons données pour le bien de ceux de ladite Religion & de la Ville de la Rochelle en particulier, ont consenty à ce qui est sous signé par les Ministres de sa Majesté, & par eux, & de surplus à ce qui est contenu dans l'acte dont est chargé le sieur de Montmartin.* Or ce que lesdits Depputez signerent avec les Ministres du Roy, ce fut le vray traicté de paix par lequel il est dit expres, *Que le Roy ne peut accorder le razement du Fort-Louys, dont ceux de ladite ville de la Rochelle font instance.* Et l'Acte dont les Ambassadeurs vous parlent, est ceste piece que vous dites estre signée & seellée de leurs Armes; laquelle ne donne pas grand fondement à ce que vous pretendez: Car apres auoir rapporté les paroles de Monsieur le Chancelier, qui dist aux Depputez de vostre Religion, *Que pour ce qui regardoit leurs affaires plus pressantes, on pourra en temps conuenable escouter leurs supplications faictes avec respect & humilité.* Ces mesmes Ambassadeurs vous font accroire par leur Acte, qu'il leur fut rapporté par personnes releuées, qu'ils ne nomment point, qu'il y auoit encores plus claire interpretation de la part de sa Maieité, & de Messieurs ses Ministres, dont le sens & l'intelligence est, qu'ils en-
tendoient parler du Fort-Louys deuant la Rochelle, &

Du 3.
Feb.
1626.

Art. 6.

Acte
du 11.
Feb.
1626.

par là donner assurance de sa demolition en temps con-
uenable. Et à quelques lignes de là ces mesmes
Ambassadeurs, pour gaigner tousiours plus
vos bonnes graces, & se faire valloir parmy ceux
de vostre Religion, vous donnent assurance,
que le Roy de la grande Bretagne trauuillera par ses
intercessions, ioinctes à leurs tres-humbles supplica-
tions, pour abreger le temps de ladite demolition. Iu-
gez ie vous prie ce que vous pouuez recueillir
de tout ce galimatias Anglois, pour cōclure que
le Roy vous ait absolument promis la demo-
lition du Fort-Louys, sous la garantie du Roy
de la grande Bretagne, veu que les articles du
Traicté de paix chantent tout le contraire.
I'ose croire que vous vous estes encores laissé
dupper quand vous dites, *Le sieur de Montmar-
tin m'assura à Nismes de la part desdits Ambassa-
deurs, qu'estans de retour en Angleterre ils feroient
deliurer à mon Frere vn autre Acte signé de la propre
main de leur Roy, par lequel seroit dit en termes expres,
que si le Roy venoit à refuser, ou à trop long temps
differer le razement dudit Fort, & l'entiere observa-
tion du Traicté de paix, ledit Roy de la grande Breta-
gne emploiroit toutes les forces que Dieu luy auoit don-
nées pour liberer sa parole, & nous faire iouyr entiere-
ment des choses qui auoient esté promises par les res-
ponses & declarations de sa Maiesté, & par l'Acte de
l'interuention de ses Ambassadeurs.* Tu me promets
tant de choses à la fois (disoit Panurge à Panta-
gruel) que i'aymerois mieux vn tien, que cent
tu l'auras. Où est aussi cette piece dont vous
parlez, & qu'on vous à faict esperer? Faictes la

nous voit s'il vous plaist, soit en original, ou par coppie. Vous ne l'avez pas, dictes le vray, & dont vous estes bien camus: car il y auoit de quoy en faire vn beau plat d'entrée. On vous a faict à ce que ie voy manger vostre pain à la fumée du Ros. *C'est ce que vous fist esperer* (ad-ioustez-vous) *ou que les conditions de cette paix seroient plus exactement entretenues, que celles des precedentes, ou qu'en cas de nouvelles oppressions nous aurions pour garand & soustien celuy qui s'estoit rendu mediateur du traitté, interprete des paroles données & plege de l'observation inuiolable d'icelles.* Il est certes facile à ce Prince d'interpreter les choses à sa poste, & comme bon luy semble: Mais pour vous, en parlant si souuent de cette caution vous faictes tout le contraire des plaideurs qui ont tousiours accoustumé d'agir premierement contre la partie principale, que contre le plege. Car nous auons plustost veu l'Anglois descendu en nos ports à armes ouuertes, que vous n'avez publié aucune requeste par laquelle vous ayez demandé au Roy l'accomplissement de ce que vous pretendez vous auoir esté promis. En quoy la courtoisie, & l'humanité du Roy de la grande Bretagne est à admirer, d'auoir si à contre-temps enuoyé vne armée en France, pour compliment enuers le Roy son bon Frere qu'il voyoit malade au liect, & toute sa Cour en dueil de la mort de feu Madame sa Sœur. Et quant au support que vous avez esperé de cette caution imaginaire, vous voyez à ceste heure comme vous avez vn pied de nez, & comme toutes choses

ses vous reüssissent au rebours de ce que vous
 vous estiez figuré, tant le bon Dieu est admi-
 rable en ses iugements. Chose qui vous de-
 uroit faire mordre les doigts, & considerer
 qu'en tout vostre faict il y a beaucoup d'in-
 iustice & d'imprudence. D'iniustice, en ce que
 cette faction dont vous vous glorifiez ne de-
 uoit iamais tomber en vostre pensée. D'im-
 prudence, en ce que vous vous estes vn peu
 trop hasté, sans vous donner le loisir de voir ce
 que deuiendroit ce nūage, s'il apporteroit ou
 vent, ou pluye, & non pas vous declarer hurlu
 burlu comme vous auez faict. Je voy d'autre
 part que vous amplifiez tousiours plus vos
 plaintes quand vous dites. *Que vous auez esté si*
mal-heureux que quoy qu'il vous sēblast que cette paix
bastie sur de si solides fondemens deust durer plusieurs
siècles, elle à esté pirement obseruée que toutes celles
qu'on a iamais violées. Car apres que le Conseil du
 Roy a reuouqué toutes les promesses qu'on auoit faictes
 à tous les Estrangers alliez de la Couronne de signer &
 conclure la ligue contre l'Espagnol, on a faict vne paix
 honteuse. Mais si cette paix à peu duré, à qui
 vous en prenez vous qu'à vous mesmes, qui
 pour acte de vos diligences confessez d'auoir
 appellé l'Anglois en ce Royaume? Baptisez
 vous du nom de paix violée. l'opposition
 que le Roy faict à cēt Estranger à qui l'on n'a
 iamais promis ce que ses Ambassadeurs ont ar-
 tificieusement controuué pour courir le mau-
 uais dessein que vous auez faict esclorre? Mais
 vous nous faites bien voir à cette heure où le

bas vous blesse, quand pour auoir moyen de
 pescher en eau trouble, vous voudriez que la
 France fust perpetuellement en guerre contre
 l'Espagnol. Appellez vous vne paix honteuse
 d'auoir mis l'Italie en repos, laquelle s'en alloit
 estre le theatre de mille sanglantes tragedies?
 Appellez vous vne paix honteuse l'establisse-
 ment que la France a procuré aux Catholiques
 de la Valtoline, qui Dieu mercy n'ont plus rien
 à craindre de la part des Grisons leurs Souue-
 rains, pour ce qui regarde l'exercice de la Re-
 ligion? La paix en fin est honteuse si elle n'est
 paye faite selon vostre aduis, & selon vostre
 goust. On sçait que ça tousiours esté le but de
 vous, & de vos semblables de semer toute sor-
 te d'ombrages & de meffiances entre les Princes
 Catholiques, afin que par leur diuision vous
 ayez plus beau ieu pour aduancer vos affaires:
 Mais quand bien pour vous complaire nous se-
 rions en guerre ouuerte contre cette Nation,
 Dieu sçait si vous assisteriez plus fauorablemēt
 le Roy en cette querelle là, qu'en toute autre.
 C'est chose que vous n'avez iamais faicte par le
 passé, & que vous faires encores moins à l'adue-
 nir. Tout vostre plaisir seroit de pouuoir cou-
 ronner le Chef de la Majesté de ce beau chap-
 peau de fleurs, qu'elle fust estroitement liguée
 & assésée enuers tous & contre tous, avec les
 Protestans de la Chrestienté, & que sous des
 pretextes & ialousies d'Estat dont vous la vou-
 driez interesser, la Religion Catholique depe-
 rist tellement que vous fussiez en fin les Mai-

stres, quand la France & l'Espagne qui font le contre-poids de la balance, se seroient ruinées l'une l'autre.

Ayant donné vn coup de griffe à l'Espagnol, vous sautez des prez aux vignes, & en reuez à vos phraſes Minſtrales, où après auoir plaint les Rochelois de tous les maux dont vous les figurez eſtre opprimez, vous dites qu'on leur a fait ſentir ſous le nom de paix toutes les plus dures conditions qu'ils pouuoient ſouffrir durant les calamités de la guerre, & pour comble de tout mal on enuieille dans l'enceinte de leurs murailles des Comiſſaires qui armez d'une authorité eminente traualloient à opprimer leſte de leur liberté, & à ſubuerbir les fondemens de leur ſubſiſtance. C'eſt grand cas que rien ne vous aggrée que ce qui eſt ſelon voſtre appetit, & n'eſtimez iamais les Rochelois heureux s'ils n'ont la bride ſur le col pour faire tout à leur poſte, & hors la cenſure de tout Magiſtrat : Mais vous ne pouuez paſſer ignorer qu'un Maiſtre des Requeſtes & un Gentilhomme huguenot ne fuſſent choiſis par ſa Maieſté pour Comiſſaires dans la Rochelle, afin d'y remettre toutes choſes en leur premiere eſtat, & y reſtablir l'ordre & la iuſtice, comme il auoit eſté conuenü par le traicté fait avec les meſme Rochelois, auquel il auoit eſté ſtipulé en termes expreſ par l'Article ſecond. Qu'ils recouroient un Comiſſaire pour y faire executer les choſes qui ſeroient arreſtées pour l'execution de la paix, & y demeurer tant qu'il plaira à ſa Maieſté. Neantmoins vous déclamez contre cela comme ſi c'eſtoit

une infraction de paix tant vous desirez que les choses demeurent en confusion. D'ailleurs, vous vous plaignez de Monsieur le Cardinal de Sourdis sans dire ce qu'il a faict pour encourir vostre indignation. Car pour moy ie n'ay entendu dire de ce digne Prélat autre chose qui vous puisse auoir desplu, sinon que rencontrant en campagne vn Ministre crotté qui ne luy rendit pas le salut tel qu'il deuoit à vn Personnage de cette qualité, il luy fut donné quelque horion du baston de la croix qu'il faict porter par tout comme Primat Daquitaine. Quand vn Cardeur de Nismes vous aura plumé la moustache si vous ne chariez droict au Party, vous me scaurez dire le desplaisir que c'est à vn homme de bon lieu de se voir mesprisé par de petits marpaux. Vous dites au surplus, *Que par Edict du quatriesme Apiril de cette année, on impute à S'imptolérance l'exercice de nostre Religion iusques à ce (dit on) que nous soyons tous remis en vn mesme deuoir sous vn mesme Pasteur, c'est à dire le Pape, pour nous faire cognoistre que nous nous trompons de croire que les plus iustes libertez qu'on nous a accordées doient estre perperuelles & inuiolables.* Que trouuez vous à redire en cela? Pretendez vous que vostre Religion soit la Religion de l'Estat, la Religion dominante, & non pas que vous en ayez l'exercice libre par souffrance, & tant que nos Roys vous le permettront par l'obeissance que vous leur rendrez? N'est-ce pas à leur seule bonté que vous deuez cette grace, s'ils espargnent le sang de leurs sujets, & si pour ne

l'espandre en les persecutant ils souffrent autant que bon leur semblera la liberté des consciences? Ce n'est pas à Agar la Chambrière de chasser Sara la legitime Espouse, n'y d'aller du pair avec elle. Nous sommes les premiers, & vous estes les derniers venus. C'est à nous à vous donner la Loy, & non pas à l'apprendre de vous. Mesmement si on vous desire vne bonne reunion, & qu'il n'y ait plus qu'un Pasteur & qu'une Bergerie, quel tort vous fait-on? Si parlans tous un mesme langage, si respirans un mesme air, & si viuans sous mesmes loix on vous souhaite de n'auoir tous qu'un mesme Temple & qu'un mesme Autel, pouuez iustement blâmer nostre charité? Car de prendre le Roy à caution de l'éternelle durée de vostre Religion, ou plustost de vostre nouvelle opinion, c'est chose qu'il ne peut pas faire, le saint Esprit n'ayant fait cette promesse qu'à la seule Eglise Catholique. Ce n'est pas que sa Majesté, humaine & debonnaire qu'elle est, vüille destruire cette Babel à coup de hache, n'y à coup de marteau, en l'esperance qu'il y a qu'elle tombera de soy-mesme, comme un Edifice basti sur le sable. D'autre-part vous vous plaignez de ce que par un mesme traitté de plume on flestrit tous les Pasteurs qui ne sont natifs du Royaume, leur arrachant la liberté de se trouuer dans les Assemblées Ecclesiastiques, Prouinciales, ou nationales. On nous interdit de donner ou prester des Pasteurs aux Eglises & Accademies estrangeres, & d'en receuoir d'elles sans

expresse permission du Roy. Vous estes vraiment bien malade. Iene vous trouue pas mieux fondé en raison sur cela que sur tout autre fuiet. Pourquoy voulez vous faire vn pot pourry de François, d'Anglois, de Holandois, & d'Alemans? Pourquoy voulez vous introduire cétte barbarie dans vn Royaume poly & ciuiliſé? Ne iugez vous pas qu'il y auroit du peril, & pour la Religion & pour l'Eſtat s'il vous eſtoit permis d'aſſembler en corps tât d'oiſeaux de diuers ramageſ? Le Miniſtre Ecoſſois qui en ſon jargon preſchoit en Gaſcongne qu'un bon Fidel ne deuoit point entrer en ſon femme, la veille de Cene, faiſoit-il pas vn bel honneur à ſa chaire, & ayant leu que la verge eſtoit le Simbole de la Juſtice, diſoit il pas aux Officiers, portez touſiours la verge droicte pour ſoulager le pauvre veufue? Ne voyez vous pas les ſottifiſes que leur faiſt dire l'ignorance des proprietez de la langue? Et quant au Sieur de Veillieux à qui vous dites qu'on n'a pas permis d'aller exercer ſon Miniſtere à Rouen, n'eſt-il pas mieux dans Paris, la ville Capitale du Royaume, où ſçauant & eloquent comme il eſt, il peut mieux eſtaler ſa marchandiſe au gouſt des Huguenots, comme pour noſtre contentement il y pourra conferer avec tant d'hommes Doctes, qu'ils le rameneront vn iour au bon chemin? Et parce qu'on dit que celuy là n'eſt pas bon preſcheur qui ſ'oublie ſoy-meſme, apres que vous auez faiſt pleurer le monde des maux que les autres ſouffrent, vous le voulez

exciter à compassion des vostres propres, que vous feignez neantmoins de vouloir passer sous silence. Je ne mets point en ligne de compte les persecutions que ie souffre en mon particulier pour l'affection entiere que i'ay tousiours portée au bien & à la conseruation de nos Eglises & pleust à Dieu seulement que pour estre ietté dans la Mer la tempeste fust apaisée. Je seray tousiours tres-aise de sacrifier mes biens, & ma vie à la tranquillité de l'Estat, & au repos & conseruation de l'Eglise de Dieu. Croyez (Monsieur) que si l'Estat vous en doit de reste, l'Eglise dont vous parlez vous est bien obligée de la belle besongne que de vostre grace vous luy auez taillée. Elle auroit à souhaitter tant elle vous est redeuable que pour couronne de vos saints labours vous fussiez desja enregistré dans le liure des Martyrs de Caluin, où il y a vn beau fueillet de papier blanc qui vous attend. Vos amis auoient desja les larmes aux yeux quand ils vous ont ouy parler de vous ietter en la Mer, comme vn Ionas: Mais ils se sont consolez lors qu'ils vous ont veu luy tourner le dos, & enfiler le chemin des Seuenes. Or pour faire ce coup genereux il vous faudroit vn peu approcher du combat naual qui se va faire aux enuiron de la Rochelle. C'est là où, si le cœur vous en dit, qu'il y aura dequoy aller pescher le turbot. Vous croyez en faisant ainsi le mariniteux parmy les Peuples; de vous concilier leur bien-veillance: Mais assurez vous que c'est vne beste qui porte tout son venin à la queue, & que tout ce que vous entre-

prenez en sa faueur vous sera en fin funeste. Nul ne lit aussi vostre Libelle qui ne fremisse d'horreur, & sur tout la où vous dites. *Qu'ayant appris par tant d'experiences que nous ne pourrions plus esperer aucune iustice de ceux qui estoient obligez de nous la rendre, & que nostre ruine estoit irremocablement concludue en l'esprit de ceux qui sont commis au gouvernement de l'Estat, que nostre patience au lieu de diminuer nos maux les augmentoit & les alloit rendre sans remede, que nous estions par tout accusez de credulité trop simple, & de stupidité insensible, ie me suis en fin resolu de chercher par autres voyes que celles qui auoient esté iusques icy inutilement pratiquées des moyens plus solides pour nostre reſtabliſſement. Vous vous couurez ce me semble d'un ſac mouillé, & plus vous vous pensez excuſer, plus vous vous rendez coupable. Car où ſont vos requestes & vos ſupplications enuers le Roy & ſon Conſeil, pour demander iuſtice de ce dont vous vous plaignez auioird'huy pour donner ſeulement couleur & apparence à votre rebellion? Ie ſçay qu'il eſt tres faux que ceux qui ont part au gouvernement de l'Eſtat ſous l'autorité de ſa Maieſté, ayent iamais medité ny procuré votre ruine. Leur longue patience à attendre de vous reuoir dans l'obeiſſance a au cōtraire faiſt quelque fois murmurer contre eux, comme ſ'ils n'apportoient pas aſſez de ſeuerité en leurs conſeils pour haſter le iuſte chaſtiment que vous meritiez. Et ſi on applique maintenant le feu & le cautere à cette playe, c'eſt apres auoir tenté en vain tous remedes doux & gracieux. Corri-
gez*

gez donc vostre plaidoyé pour ce chef là, comme aussi pource que vous dites apres de plus atroce. Et parce que le Roy de la grande Bretagne s'estoit rendu mediateur de la paix, & par l'Acte de ses Ambassadeurs, auoit cautionné qu'elle seroit inuolablement obseruée, i'ay creü qu'il estoit non seulement necessaire: Mais aussi tres-iuste de recourir à luy, luy faire voir quels soings on auoit pris à tromper nostre facilité, eluder nos esperances, & destruire tous les fondemens apparents de nostre liberté, le sommer de sa parole, & le coniuurer en mon nom, & de toutes nos Eglises d'intervenir selon sa promesse, & moyenner que la paix qu'il auoit faict conclure fust fidellement executée. C'est vne action que ie croy ne pouuoir estre blasmée par nos ennemis mesmes s'ils ne sont sans raison, n'y reprounée par les nostres mesmes s'ils ne sont sans conscience. Autant de paroles, autant de potences. Vous estes seul sage, & le reste du monde n'est que folie au prix de vous: Mais i'ay seulement à vous dire que cette action sanglante & criminelle, est tellement le seul ouurage de vos mains que tous les Huguenots de la France horrmis quelques Fanatiques que vous auez desbauchez, desaduouient & detestent si fort vostre procedure violente, iniuste & denaturée, que comme le Sacrificateur iettoit tous les pechez d'Israel sur la teste du bouc qu'il chassoit au desert, c'est aussi sur vostre reuerence seule qu'ils versent toutes les maledictions qu'on scauroit donner à l'Authheur d'un Acte si scelerat que d'auoir faict entrer l'Estranger dans ce Royaume. Tout ce que vous dites donc des Eglises en ge

neral est faux, & ne sont pas toutes complices de vostre crime. Car s'il y en a quelques vnes qui vous ressemblent & qui vous suivent, c'est à l'extresme desplaisir des autres.

Du
samedi
dy 11.
Sep-
tembre

Le premier Consul de la ville d'Vsez la bien faict voir par sa fidelité, en ce qu'il a mieux aymé tout quicter & abandonner la propre maison, que de souscrire à ce que vous avez faict resoudre dans la belle Assemblée que vous fistes conuoquer en ceste mesme ville, le mois de Septembre dernier. Car les cheueux luy dresserent d'horreur, lors qu'il vous ouit proposer que pour sauuer la Rochelle il se falloit ioindre à l'Anglois, ce miserable Conuenticule ayant déclaré par vostre aduis. *Que le seul moyen qu'on pouuoit opposer à ce pernicieux dessein, estoit la prompte & puissante assistance du Roy de la grande Bretagne.* C'est où ils loüent aussi vostre prudence, vostre zele, & vous estiment digne d'estre tres-humblement remercié pour les soings que vous avez employez en ceste negotation. Ils adioustent encores crime sur crime par ces paroles execrables, apres vous auoir proclamé pour leur Chef. *Ladite Assemblée ayant promis de son costé de ne receuoir n'y accepter aucune paix, que conioinctement & avec le consentement de sadite Majesté de la grande Bretagne.* Leur folie s'est mesme estenduë iusques là, que de iurer par leur serment d'vniou. *Que d'autant que le Roy de la grande Bretagne a faict descendre ses armées en ce Royaume pour faire reparer les infractions de l'Edict & cœt. Nous protestons de nous ioindre à ses armes, comme aussi à celles de*

Monsieur de Rohan. Non que pour tout cela ils vueillent estre tenus moins bons François, & très-hübles seruiteurs de leur Roy. *De l'obeissance duquel ils protestent ne se vouloir iamais despartir:* Mais ils sont du tout plaisants, quand n'ayans non plus de puissance de maudire, que de benir, ils disent qu'ils declarent tenir pour Deserteurs de l'union & ennemis de nos Eglises, tous ceux qui refuseront ce serment & qui y conuiendront. Voila la belle leuée de bouclier que vous auez faicte pour seduire & abuser ces pauvres insensez, à qui vous contez des merueilles de l'armée formidable d'Angleterre, qui s'en va toute en chiant brenât, & laquelle n'a faict pour tout exploict de guerre en trois mois que manger les raisins de l'Isle de Ré: Mais comme c'est le propre des Peuples mal conseillez de faire des Rodomonts quand ils voyent le peril loing; il n'y a aussi rien de si lasche & abbatu lors qu'ils sentent le Maistre s'approcher d'eux les verges a la main pour les chastier. Or si le bas Languedoc ne se veut faire sage par les maux d'autrui, qu'il s'instruiffe au moins par les siens propres. Car il n'est pas tousiours bon de se picquer au ieu, & vaut quelque fois mieux se retirer doucement avec sa perte, que de tout hazarder. Ce n'est pas que le mal que faict vn coing de Prouince, doint estre imputé à tout le corps de vostre Religion. On sçait que ce n'est pas d'aniourd'huy qu'il y a entre eux des broüillons, & des pacifiques. Il y a long-temps qu'un de vos Iurisconsultes faisoit grande différence des vns aux autres, &

Car.
pens.
ad
Franc.
Port.
ann.
1572.

soustenant les bons desquels il estoit. Les nostres (disoit-il) estoient doux & pacifiques, contens de leur presente fortune, & de la clemence de leur Prince, Eux au contraire (parlant des factieux) estoient fort turbulens, audacieux, & non contens de la liberté de conscience, & exercice de la Religion qui leur est octroyée, ils vouloient tout renuerser, se nourrissoient de sedition, & prenoient le certain pour l'incertain. Bref, toutes les marques par lesquelles en l'Escripture sainte on peut discerner les bons d'avec les mauuais, nous separoient d'eux, ils faisoient assiduellement des conuenticules & des assemblées. Là ne se parloit n'y de Dieu, n'y de paix, n'y de tranquillité. Les propos qui s'y tenoient n'estoient que de guerres, & dissensions. En public ils mettoient en auant le pretexte de la Religion, en secret ils ne bastissoient que guerres & dissensions. Et comme Mimos & Licurgue, ils fondonent le Principal appuy de leur Republique sur les armes. Aussi toute l'esperance de leur Cause reposoit du tout sur la force, & non contens des calamitez des guerres passées dont on voit encore toute la France ruinée, ils vouloient afin que i' vse des mots de Samuel, deuorer perpetuellement la France de leur glaue. Nous au contraire à l'exemple des Lacedemoniens estimions qu'il falloit sacrifier aux Muses, & non à Mars. C'est à dire qu'il falloit chercher les moyens honnestes de reconcilier nos Aduersaires par tous bons offices, sans les prouoquer d'auantage par iniures, & par armes contre nous. Si de ce temps là l'on tenoit vn langage si moderé, ie croy qu'il y en a encores aujour'd'huy qui diroient la mesme chose, & qui se separans de vos maudits & detestables desseins, ne voudroient

auoir part à tout ce que vous tramez contre la
 tranquillité publique. Comment ne se main-
 tiendroient ils en ce deuoir, eux qui sont natu-
 rels François, veu mesmes que les Estats de Ho-
 lande qui sont aussi forts Huguenots que vous,
 ont renouuelé leur alliance avec la France de-
 puis la descente des Anglois en l'Isle de Ré,
 promettans au Roy par leur traicté du vingt-
 huitiesme Aoust dernier; Article troisieme.
*Qu'ils ne donnerant directement ou indirectement sous
 quelque couleur que ce puisse estre aucun secours n'y
 assistance contre sa Majesté. Le bon est que vous
 pensez auoir ouuert vne porte de derriere pour
 vous sauuer quand vous dites, que ceux qui ont
 mendié & emprunté les forces de l'Estranger, d'une
 Religion contraire à la leur pour nous opprimer, ne peu-
 uent se plaindre que nous ayons recherché celles de nos
 propres Freres pour nostre deffence. Vous voulez dire
 en bon Logicien de robe courte, que le Roy
 s'estant ces années passées serui du Vice-Ad-
 miral des Holandois contre la Rochelle, vous
 pouuez en aussi forts termes comme general
 des Eglises faire venir en France vn Admiral
 d'Angleterre pour garder la Lune d'estre man-
 gée des loups: Si vous assortissez aussi bien les
 liurées de vos gents, il faict moult beau voir
 vostre equipage. Ce sont bien là billes pareilles.
 Et pour vous iustifier tousiours plus à reculons,
 vous vous allez imaginant qu'on ne peut conscien-
 tieusement improuuer vos actions, si en mesme temps
 on ne qualifie de titres odieux & execrables, la rési-
 stance genereuse de ceux qui nous ont precedé, & qui*

par leur sang nous ont acquis vne si sainte liberté, & cœt. Et que par les Edicts de nos Roys, ils sont qualifiez fideles & obeissans subiets & seruiteurs, & leur memoire est; & sera à iamais en benediction au milieu de l'Eglise. Certes ie ne sache pas homme qui loüe & approuue les hauts faicts d'armes de ces Machabées vos Deuanciers, qu'il ne doïue exalter les vostres par dessus les leurs, comme aussi en blasmant ceux là, on vous doit encores plus detester. Tellement que vous voudriez conclure par vostre discours, que si vn Admiral de Chastillon a esté estimé grand guerrier, il est raisonnable que vos trophées aillent tout au moins du pair avec les siens, si vne fois en vostre vie il vous arriue de donner des batailles comme il fist en son temps. Helas ce bon Seigneur là fist tant & tant le mestier qu'il s'en lassâ en fin, & ayma mieux s'exposer à tout ce que la mauuaise Fortune pourroit coniuurer contre luy, que de despendre plus de la mercy d'un Peuple forcené, & qui vray Prothée se change a tout moment. Quant à la qualité de fideles seruiteurs que les Edicts de paix donnoient aux gens que vous dites, il est facile de iuger que cestoit par la grace du Prince qui pardonnoit leur crime passé, en esperance d'amendement, & a cause de la repentance qu'ils en tesmoignoient, & non qu'ils creussent en conscience de meriter cela. Il vous semble aussi que si la Ligue a durant nos guerres ciuiles recouru à l'Estranger, & s'est opposée à l'establissement d'un Roy, d'autre Religion que de la Catho-

lique : Il vous est aduis, dy-je, que vous pou-
 vez aujourd'huy faire le semblable, comme si
 ce qu'il y a eu de violent en vn Party, deuoit
 seruir de regle & de modelle à vn autre pour s'y
 conformer. Bref, ny les Anciens, ny les mo-
 dernes de tous ceux que vous vous proposez
 pour exemplaire n'ont rien faict au prix de vous,
 à qui seul la palme est deuë de les auoir tous
 surpassez en felonnie, en insolence, & en mes-
 pris de la dignité de nos Roys, que vous foulez
 outrageusement aux pieds, & laquelle ceux-là
 auoient encores en quelque reuerence, comme
 l'histoire le tesmoigne, par leurs humbles re-
 monstrances & declarations. Se faut-il ainsi
 iouer d'une chose si sacrée qu'est la Royauté ?
 Faut-il auoir les Oincts du Seigneur en si peu
 de veneration ? Sçauiez-vous pas qu'on fist
 mourir celuy qui par mesgarde s'estoit assis dans
 la chaire d'Alexandre ? Ignorez-vous que ce ne
 fust vn crime capital de lauer la main, & mesme
 de faire de l'eau ayant vn anneau au doigt où l'i-
 mage de l'Empereur fust grauée ? Vous deuriez
 non seulement vous cacher de honte, mais bien
 vous pendre, d'auoir semé ce fatras contre le
 Roy vostre Maistre, qui vous le rendra plustost
 que vous ne croyez. Passant outre, ie vous di-
 ray qu'un menteur doit auoir bonne memoire
 de peur de s'entretailer : Car vous deschargez
 ceux que vous accusez cy-dessus, apres que
 vous vous estes hautement glorifié de l'illustre
 qualité de General des Eglises, que vous dites
 tenir de l'Assemblée de la Rochelle, qui vous

en bailla l'investiture, toutes les Paix & les Guerres s'estans faictes sous vostre autorité; En quoy ie vous trouue aussi bien fondé en vostre mission, que vos Ministres sont en la leur. Se declarer Chef de faction dans vn Estat Monarchique, est vn si petit crime; que Neron accusa Cassius de leze Majesté deuant le Senat; parce qu'il auoit seulement trouué sur la statue d'vn de ses Peres, ceste inscription, **AV CHEF DE PARTY.** Mais rien n'est crime à celuy qui aualle, non le moucheron; mais qui deuore le chameau. Or par ce que vous voulez que l'honneur de la descente des Anglois vous soit entierement deu, vous l'auiez procurée y estant obligé (dites-vous) par les serments que vous auez faits en toutes les Assemblées, & que vous seriez parjure & deserteur d'une si sainte & iuste cause; si par vos travaux vous ne procuriez la deliurance de tant de pauures Eglises persecutées, & cet. Mais voyons comme par vostre confession mesme, vous vous chargez seul de toute la manigance, à la iustification des autres Huguenots du Royauime, qui vous iugent personnage de grande preud'homme, d'en parler en ceste candeur & sincerité. Il pourroit sembler (dites-vous) à quelques-uns que i'eusse deu entrer en communication avec nos Eglises auant que me resoudre à ceste negotiation, & à sommer le Roy de la grande Bretagne de sa parole: Mais ie ne pense pas que les personnes de bon sens se puissent arrester à vn scrupule si frivole. Car chacun sçait que par my les Communitez il n'y auoit pas assez de resolution pour c'ela. Iesçay bien que tous le desiroient, mais nul qui l'osast entreprendre.

Que

Que tout le monde est plein parmy nous d'Espions gagez pour descouvrir toutes les bonnes actions, & les rendre inutiles, que de communiquer vne chose si chatouilleuse à plusieurs, c'estoit l'éuenter, & perdre ce qui nous restoit d'esperance de reſtabliſſement. Voyla par la mort-bleu vne grande franchise: Il n'y a iamais eu croquant qui ait mieux deſchargé ſa conſcience ſur l'eſchelle que vous faites la voſtre en raze campagne. Vous auriez auſſi eu grand tort d'accuſer les innocens, ausquels vous auez tres-bien fait de n'en rien communiquer, & croy que vous euſſiez eu fort peu de compaignons à l'entreprise d'une choſe que vous meſme recognoiſſez eſtre fort chatouilleuſe, comme ſi en la faiſant le derriere du col vous demangeoit vn peu.

Ceux de Montauban & de Caſtres entre autres teſmoignent bien qu'ils ne ſont pas de voſtre cabale par la longue lettre que vous en eſcriuirent les Conſuls de Millaus où ils vous parlent en ces termes. *Après la deſcente des Anglois en l'Iſle de Ré Monsieur d'Espernon eſtendant ſes ſoings iuſques à nous qui ſommes à l'extrémité de gouvernement pour nous commander de demeurer fermes en l'obeyſſance du Roy les villes de Montauban & de Caſtres nous exhortent à meſme deuoir par leurs Depputez. Sur ces occurrences nous priſmes reſolution de ne nous deſpartir iamais de la fidelité & ſubiectiō à laquelle Dieu & noſtre naiſſance nous obligent enuers ſa Maieſté ſous les benificer de ſes Edicts & ſans nous enquerir plus auant du deſſein de l'Eſtranger ny des intereſts qui l'auoient pouſſé à cette deſcente, nous*

du 23.
Sept.
brs.

promismes par serment de ne luy point adherer. croyans fermement qu'il ny a raison d'Estat ny de Religion qui nous le conseillent.

Du depuis nous auons appris que plusieurs Villes de la Religion du bas Languedoc & des Seuenes se preparent à quelque souleuement sous vostre auen & de vostre ordre nous ne sçauons pourquoy ils le font : Mais quand ce seroit en intention de reparer les ruynes & releuer les masures du General de nos Eglises nous sommes neantmoins resolu de persister en nos deliberations & auons creu estre obligez de vous en donner cognoissance & de vous en enuoyer vne copie & cat.

Sçachant d'ailleurs que nous deuons passer nostre vie & nos enfans apres nous dans cet Estat & sous la domination de nostre Roy, & qu'il nous est impossible d'auoir tousiours des armées sus pied pour y subsister, nous auons creu que nous deuons principalement rechercher l'accomplissement des choses promises dans la bienveillance de nostre Roy par humilité & obeysance, & cat.

Nous auons aussi des raisons particulieres qui se rencontrent, à sçauoir la corespondance que nous deuons auoir avec les capitales Villes de ceste Prouince, qui sont en vne mesme asiete que celle-cy, & nostre pauureté est si extresme qu'elle ne se peut représenter les dernieres maladies nous ayans laissé des foibleesses si grandes que nous ne sçaurions resister à la recheute, & au lieu de receuoir du contentement de nos seruices, vous n'y trouueriez que le regret de nostre soudaine ruine.

En fin, si parmy vous quelqu'un n'est fait au badinage pour approuuer vostre mystere

d'iniquité, que vous appelez LES BON-
 NES ACTIONS, s'il ne trahit, & s'il
 ne monopolise, il vous est suspect, & le tenez
 pour Espion à gages: Mais encores nous direz
 vous bien, s'il vous plaist, qui a esté vostre Con-
 fident en ceste affaire. Pour monstrier que ie n'ay eu
 autre dessein en ceste negotiation que celui du bien pu-
 lic, ie n'y ay employé que le sieur de saint Blancart,
 duquel le zele à l'Eglise de Dieu a esté cogneu à vn cha-
 cun, &c. Courage, acheuez, cela est fort bien
 venu, tirons le reste. Mon frere a grandement ad-
 uancé l'affaire par sa presence, & ses sollicitations con-
 tinuelles, & Dieu m'a fait la grace de l'amener à
 sa perfection par l'employ dudit saint Blancart.
 O heureux & trois fois heureux, Athlete de la
 Foy, second Haute fontaine qui t'es faict assom-
 mer des premiers par la main du valeureux
 Thoiras, pour estre celebré apres ta mort de la
 bouche d'un si bon Maistre qui t'eust enfin faict
 honorer de l'ordre de la iartiere, avec vne
 iolie rotonde de rouge cramoisi. Il n'y a à
 ce conte que deux principaux fabricateurs de
 ceste coniuration. Ce ne sera pas certes grande
 despoüille au valet mignon qui tendra leur
 defabiller à la soldade sur le cul d'une charette
 en place marchande, & où ie croy qu'il fairoit
 bon ouir chanter en musique au lieu d'un Salué,
 les Eloges que vous donnez au Roy de la grande
 Bretagne, quand vous dites de luy ces douces
 & belles paroles pindarisées, qu'il n'est porté d'au-
 tre ambition, que pour pouuoir adiouster à sa Couronne
 ce riche Eleuron d'honneur, d'estre liberateur des Egli-

ses de ce Royaume, qui par leur foy & constance se sont
 rendus celebres par tout le monde. Adioustez cela
 au tiltre de Chef de l'Eglise Anglicane, & il ne
 luy faudra plus qu'une Tyare Pontificale sur sa
 teste pour le Deifier. Vous parlez net, on
 vous entend, il ne nous fait point de commen-
 taire. Vous n'estes non plus obscur quand vous
 protestez de vous joindre à ses armes, & de ne vous
 detacher point du bien general par aucun accommo-
 dement particulier, & d'obtenir avec luy une bonne paix,
 ferme & assurée: Mais ie ne sçay si ie vous oserois
 dire ce qu'on disoit a ce Romain qui faisoit du
 brauache. Adiouste à tes forces, ou diminue de ton
 courage. On dit aussi que qui compte sans son
 hoste compte de ix fois, & ie voy qu'en la mes-
 sance que vous avez de voz forces & qu'on ne
 donne sur vos atours, vous coniurez tous
 les huguenots de se rallier avec vous, ayans pour
 soutien un Prince si Religieux, si fidelle, si vaillant,
 & si puissant. Mettez cuire la dessus tant qu'il
 vous plaira: Mais pour moy ie gagerois le double
 contre le simple, que cette grande montagne
 n'engendrera qu'une souris. Nostre Histoire re-
 marque qu'un du nom fatal de Bouquinguan,
 il y a deux cents ans ne fist pas plus beau pro-
 grez. Car il leua le siege de deuant Nantes,
 & est chose notable qu'il mist pied en France
 la veille de la Magdeleine, qui est le propre iour
 que cestui-cy descendit en l'Isle de Ré. D'ail-
 leurs, j'admire la grande vigueur de vostre esprit,
 Car non content de trancher de l'homme d'Estat
 & du General d'armée, vous venez mesmes vous

Dar-
 gentré
 en
 l'anné
 1380.

percher sur les poincts de Theologie, & blas-
 mant ceux de vostre Religion qui tiennent qu'il
 faut plustost souffrir l'exil, ou le Martyre, que de
 repousser la force par la force, s'opposer à son
 Prince & prendre les armes contre luy, vous
 dites, *que cela est un discours de loüage, que c'est un*
effect de la pension qu'ils ont touchée, ou qu'on leur faict
esperer, & que ce langage est un precursor de declara-
tion d'Apostasie. Et a quelques lignes de là vous
 ne denoüiez pas le neud gordien: Mais vous le
 coupez tout à trac. Je sçay que ce poinct à esté resolu
 par des Theologiens excellents lesquels soit en pieté, soit
 en doctrine, ceux de ce siecle ne surmontent pas. Je croy
 quand Dieu nous veut deliurer par moyens humains,
 comme souuent par iceux il a restauré la condition ex-
 terne de son Eglise, nous ne nous deuons pas opposer à cee
 œuvre: Mais que nous deuons travailler avec les in-
 struments de nostre deliurance, & recognoistre sur tout
 en cecy la benediction de Dieu esbandüe sur les saintz
 & genereux trauaux de nos Denanciers, par la ferme &
 hardie resistance desquels il a pleu au Seigneur procurer
 liberté, repos, & prosperité à son Eglise. Vous n'e-
 stes pas mieux verlé en ce mestier qu'en tous les
 autres. Car vostre Theologie est meslée de souf-
 fre & de poudre à canõ. Les plus sages d'entre vo-
 dõnent l'exercice de leur Religion à la pure grace
 du Roy, & non à leurs armes n'y à celles de leurs
 progeniteurs: Mais l'excellence de vos com-
 pliments pour la bonne bouche, est, *que vous*
n'auex aucun pensement à vous escarter de l'obeissance
& fidelité, à laquelle la nature & la conscience vous
obligent enuers le Roy vostre souverain Seigneur.

Courez vous (Monsieur) la sueur vous est bonne, vous n'estes que trop honneste. Sa Majesté vous demeure encore fort obligée de ne vous voir pas faire pis, que d'attirer l'Estranger dans son Royaume, & d'armer ses subjets contre elle comme la nature & la conscience vous obligent.

Finalemēt pour exciter les Fielles à vous canoniser comme vn Saint qui ne guerit de rien, vous rebattez encores les maux que vous souffrez pour la querelle publique. Vous representez que *vostre Famille est contraincte de chercher par vn banissement volontaire parmi les Estrangers le repos qu'elle ne peut trouuer aupres de vous.* Patience, (Monsieur) si l'exil n'est que volontaire, vous n'avez pas dequoy vous plaindre. Nous croyons aussi que c'est par deuotion, & pour le bien de la Cause que Madame vostre chere moytie, à fait ce petit pelerinage à Genesue, & de là a Berne, où il est croyable qu'elle a chanté en passant le Pseume, *Donne secours Seigneur il en est heure,* comme vous entonnerez vn de ces matins celuy qui commence, *Mon Dieu l'ennemy m'environne* quand vous verrez l'armée du Roy vous chauffez les esperons en Languedoc: Et si la mesme Dame est auioird'huy à Venise, elle n'est pas en pays perdu, n'y en terre d'ennemy, elle est en Ville pourueüe de tout & d'où elle escrit, que la Seigneurie la recueillie si fauorablemēt que mesmes on luy permet chez elle l'exercice de sa Religion comme aux Ambassadeurs Protestaus. C'est là vn exil fort gracieux. Tout le Mal-

heur qui luy est arriué, c'est que comme par hon-
 neur on luy auoit préparé vne magnifique colla-
 tion sur la Mer, il se leua soudain vn orage si im-
 petueux & si puant, qu'il infecta tellement toutes
 les confitures & les pieces de four, qu'il fut im-
 possible d'en pouuoir manger. O desastre, O in-
 fortune pour les Pages & les Lacquais, qui
 eussent bien eu là dequoy fripper les plats! Et
 pour vous, vostre courtoisie ou plustost le zele
 dont vous estes tout ardent, vous faict protester
 d'estre prest de vous exiler de ce Royaume, passer le
 cours de vostre vie parmy les Estrangers en homme
 priué, quand vous y deuriez mendier vostre pain,
 pourueu que (comme vn autre Simeon) vous
 puissiez celebrer la bonté de Dieu de vous auoir rendu
 instrument de la liberté, & de la deliurâce de ce pauvre
 peuple qui gemit sous vne dure & seruile persecution.
 Vous faictes bien de n'en dire pas d'auantage.
 Car ces tristes & piteuses paroles feroient fondre
 en larmes vn cœur dur comme les fesses d'un
 Postillon. Non que ie ne vous conseillasse com-
 me vostre seruiteur de vous en aller au hault &
 au loing, & le plustost tant mieux pour euites les
 fausses Propheties, sur tout à cette heure que
 vous voyez la belle incagade que vostre grand
 Admiral d'Angleterre vient de faire en l'Isle de
 Ré qu'il a si honteusement quittée. Je croy que
 pour retraicte, vous n'en scauriez choisir vne plus
 digne de vous, que la Haye en Holande le seiour
 des fauorits de la Fortune, où comme Duc &
 Pair exilé, vous logerez en chambre garnie pres
 la personne du Roy de Boésie, nullement im-

portuné de ses subjects. Vous serez assis à sa table,
où l'on sert à l'entrée des cure-dents d'un bois
odoriferant, & à la Cour duquel vous aurez tout
loisir de souffler à vos doigts, & de iouer à l'esba-
hy.

Malo veris offendere, quàm placere adulando.

F I N.



